



**PONENCIA
POLÍTICA**
Aína

03

Antoxana: el fatalismo y
una mirada nueva

04

01 Soberanismo
asturianu: mucho
más que coses de
banderes

05

02 Somos
d'izquierda

08

03 Feminismu
y xusticia

09

04 Futuru
n'Asturies

12

05 Territoriu

13

06 Servicios
públicos

15

07 Cultura y
globalización

16

08 Derechos
humanos

17

09
Internacionalismu

18

10 Democracia
participativa

20

Pallabres finales

Antoxana: el fatalismu y una mirada nueva

El pueblu asturianu tien na so sencia, dacuando, una visión fatalista de la vida. “Si tien arreglu s’arreglará y, si nun lo tien, arreglao ta”. Si no individual esto pue ser un maeru al qu’enferronase en tiempos de penuries, no colectivo esa visión pue conderganos a una resistencia pasiva, primero, y a baxar los brazos depués énte un mundu siempres en cambi u de la que s’accepta cualesquier y toa visión o idea qu’esi mundu exterior mos imponga.

La mirada nueva, la mirada aliella, que dende **Aína** naguamos por tresmitir a la sociedá asturiana ye, necesariamente, una mirada doble, hacia dientro y hacia afuera. Ye necesario mirar afuera de nós, afuera d’Asturies, col aquél de conocer el sentíu que sigui’l mundu y adoptar aquello que mos puea facer una sociedá meyor, más próspera y xusta. Entendemos a nós gracias a entender otre realidaes, cercanes y llonxanes. Muchos dicen seguir esta sienda y hailos que lo sienten asina de manera sincera, fonda y firme.

Pero llendase namás a esta visión, dende la mirada atlántica y seña d’osa que mos caracteriza, tien el peligr u obvi u d’acceptalo too de manera acrítica, despreciando’l nuestro ser propiu y desabriéndose de los nuestros recursos y fortaleces. El resultáu d’esa visión única tien de ser l’allumamientu de pastiches y soluciones inútiles que mos sigan llevando pel camín a nenyuri. Ye precisu, poro, esa otra mirada hacia dientro, hacia lo que fuimos, somos y podemos ser, alloñándonos de les postures que, endolcaes en cosmopolitismu, escuenden prexuciu, auto-odiu y una visión inmovilista, conservadora y mui poco analítica no tocante a la historia tresformadora del nuestro pueblu.

Respetar y dignificar eses idiosincrasies, esa visión propia con un enfoque popular sobre tolo que nos arro dia, al tiempu que s’aprovechen les novedaes que nacen de los progresos globales, nun ye dable si la xente asturiano nun se fai responsable de decidir el so propiu camín. Pa ello ye necesario tener a la mano les ferramientes afayadices (polítiques, presupuestaries, fiscales y, sobremanera, la palanca social) que mos permitan decidir cuáles son les nuestres prioridaes de desenrollu pa garantizar una vida que pague la pena vivir.

Esa responsabilidá, esi facenos cargu de les nuestres vides y futuru definen un principiu quizalera d’**Aína** que toca con tolos demás, tresformando la manera d’afrontalo too: les soberaníes -más que la soberanía, en singular- de los y les asturianos sobre too aquello que cinque a les cuestiones y retos a los que, como sociedá, hemos de poner igua dende lo colectivo, mandándonos de la noción más pura del conceptu xusticia; esto ye, el bien común.

N’**Aína** afitamos, entós, que sobre esta base de los soberanismos asiéntense los nuestros principios, que nos posicionen nun espaciu políticu que fala a la sociedá asturiana dende la izquierda, el feminismu y la llucha pola xusticia social; que defende les cultures de tolos pueblos y refuga’l papel uniformizador y negador de derechos colectivos qu’afita la llamada globalización económica; que pon los derechos humanos y la fraternidá ente les trabayadores de tol planeta enriba la mesa; que defende’l territoriu dotando de servicios públicos, reindustrialización consecuente pa col mediu ambiente y la ferramienta de la democracia participativa a les persones que vivimos nesti cachín de tierra ente montes y mar que garra’l nome d’Asturies nesti tiempu que nos tocó vivir.

01 Soberanismo asturianu: mucho más que cosas de banderes

Aína ye un proyectu fechu dende Asturias y p' Asturias: una ferramienta política pa facer pueblu y meyorar les condiciones de vida de toles asturianas. Una Asturias que, garrando les blimes del pasáu, imaxine y construya l' Asturias del futuru.

El principiu del soberanismo ye un conceutu ampliu que cinca tolos demás principios del nuestro proyectu políticu. Pa ser esautos, nun se pue falar de soberanismo a seques; hai que falar de soberanismos: de soberanismo políticu, alimentariu, enerxéticu, residencial, tecnolóxicu, sanitariu, cultural... anque esti enfoque multinivel, tresformador, que pon nel centru del discursu les condiciones de vida del común, suel quedar tapecíu nel debate públicu, arrequegando'l potencial de la soberanía como ferramienta a una supuesta batalla estéril ente banderes ensin significáu políticu ya ideolóxicu que plantea una confrontación en términos de llexitimidá democrática.

N' Asturias existe un espaciu políticu propiu que naz na metá de los años '70 dende'l texíu cultural antifranquista, qu'espurrió, pali que pali, les sos propuestas a toles estayes de la política: la economía, los derechos sociales, la organización y articulación del país, les propuestas ambientales o la rrellación de les instituciones asturianas con otros territorios y pueblos del mundu pa ufrir un modelu de país alternativu, vidable, averáu a la realidá nuestra, meyor y más xustu.

Nesti sen, y siguiendo la llínia marcada por aquella xeneración, **Aína** nun naz como movimientu organizáu pa facer de menos a naide, nin pa sorrayar les diferencies ente los pueblos del mundu emponderando, irracionalmente, lo propio -como si esto fuere lo bono- énte lo ayeno -como si aquello fuere lo malo-. Non, el nuestro nun ye esi enfoque nacionalista, que tan bien conocemos n' Asturias y que nos fai súbdites d'una familia, que nos indica qué llingua ye la de prestixu y cuáles non, que nos llanta una historiografía cuadonguista, reaccionaria y anticientífica, autoxustificativa. Nun ye esti un proyectu que pretenda llantar fronteres a la collaboración ente pueblos, a la solidaridá, al respetu mutuu, nin ún qu'afale la xenofobia y el clasismu en toles sos estayes. De fechu, oponémonos a eses lóxicos reforzando'l sentir d'acoyida del nuestro pueblu como un activu de presente y futuru.

Falar de soberanismo na Asturias del 2022 consiste n'afirmar que ye hora de que nesti país se faiga política en vez de miagar recursos y xestionar, como capataces d'una plantación esclavista, les migayes que caigan na nuestra mesa. Necesítase un partíu políticu como **Aína** que reclame pal Pueblu Asturianu la capacidá de pensar y decidir les soluciones pa los problemes d' Asturias: los económicos y productivos, los demográficos, los llaborales, los derechos sociales, la cultura, el territoriu... Cualesquier decisión que pase

01 Soberanismo asturianu: muncho más que coses de banderes

per reproducir soluciones vieyes nun va dar otra cosa que los mesmos resultaos que llevamos décadas careciendo y que nos emburrien al desaniciu económicu, la emigración de la mocedá, l'emprobecimientu de les condiciones de vida de les clases populares mentantu pa esta tierra queda namás el monocultivu turísticu estacional, cada vegada más agresivu pa col mediu y les persones que nél vivimos.

Nun hai qu'escaecer tampoco que pa exercer un verdaderu soberanismu políticu ye condición asegurar un soberanismu fiscal. Que, nun país como Asturias con un presupuestu de 6 mil millones d'euros, les alministraciones asturianas recalden menos de 300 millones d'euros significa que los asturianos nun tenemos la capacidá pa decidir cuáles son les nuestres prioridaes porque les partíes yá vienen asignaes per estayes, pasadines pela peñera d'un modelu económicu y territorial diseñáu al gustu de les élites empresariales que manden nel Reinu.

Ente la llamurga socioeconómica, política y cultural, hai un asturianismu que decidió entrar a los partíos estatales y exercer una presión o promoción dende dientro. L'ésitu ye parcial. Hai una sensibilidá mayor en dellos partíos, sí. Pero los centros de poder y influencia política nun van camudar asina a nun ser que les sucursales asturianas de los partíos estatales vean nacer y medrar una alternativa propia que vaya ganando'l favor de los asturianos y asturianas y acabe afitándose como opción de gobiernu. Esi ye, güei, el nuestro proyectu.

02 Somos d'izquierda

Asturies ye un país de trabayadores que suañaron cola xusticia social. Güei, garramos aquellos banderes y anovamos aquellos lluches pa seguir la sienda de los valores republicanos colos que tresformar l'orde social y la economía pa ponela al serviciu de la mayoría.

Nuna sociedá, nun hai nada más importante que'l bientar del común. Ensin xusticia social nun existe nenguna posibilidá de construyir un proyectu colectivu que pague la pena, que nun dexa a naide atrás. Poro, la nuestra acción política tien el deber de dar soluciones a los problemes que carecen les clases populares, plantegando horizontes socioeconómicos nuevos que garanticen el desaniciu de la esplotación del home pol

home pa texer una sociedá que fine cola lóxica de les clases sociales que nos ponen a unes per baxo d'otres.

Dende la crisis enerxética de los 70 del sieglu pasáu y cola llegada del reaganismu y thatcherismu, impúnxose en mundu una modalidá de capitalismu desabierta de les condiciones físiques de producción y centrada namás nos movimientos de capital. Nació'l neolliberalismu o capitalismu financieru que se vistió como globalismu magar que lo único que se movía y mueve llibremente ye'l dineru: enxamás se socialicen los derechos nin la riqueza.

Seya como seya, la lóxica neolliberal ta llevando a una progresiva desmantelación del estáu del bienestar y los servicios públicos porque, pa sostenese, el capitalismu financieru necesita estayes nueves d'actividá coles que xenerar más capital. A eso hai qu'axuntar la necesidá que tien el capitalismu financieru d'aumentar de continuo la so "productividá", teniendo como tien, pa ello, trés estratexes: l'anovación tecnolóxico pa poder despedir más trabayadores, la contratación "d'autónomos" (asalarios a los qu'obliguen a amazaritase d'emprendedores) y la reducción de los salarios. Resumiendo: desempleu, trabayu precariu con peores sueldos (el nuevu fenómenu social ye'l "trabayador probe") y cero servicios públicos. Eso ye'l proyectu neolliberal, non la consecuencia de nenguna crisis. O, si queremos velo d'otra manera: el so modelu ye la crisis, que pagamos nós, y los beneficios, qu'algamen namás unos pocos privilexaos.

La situación ta llegando a estayes dramátiques cuando consideramos que partíos que se dicen d'izquierdes asumen esti esfarrapamientu como inevitable por consustancial al únicu sistema posible (dicen) de rrellaciones sociales y económicques, un sistema que se tien qu'apropiar de toa actividá humana (inclusive la sanidá y la educación) pa monetizala, pa xenerar beneficiu de lo que son derechos irrenunciabiles.

Hai partíos que se dicen d'izquierda y qu'aplauden, por exemplu, la llegada d'un hospital priváu a Xixón y afiten qu'eso namás va facer medrar la calidá de l'atención sanitaria n'Asturies. Ye triste tener que recordar que cuando la iniciativa privada presta un serviciu failo pa xenerar unes ganancies y non pa prestar una atención a les persones (y menos si son vulnerables). Nun ye una posición ideolóxica, ye una realidá y abasta con ver el llabor de los hospitales públicos y los privaos n'Asturies durante la crisis del coronavirus pa constatalo: si nun hai ganancies, nun hai serviciu.

Poru, **Aína**, como proyectu políticu d'izquierda, afita que'l centru de la nuestra actividá política ha ser la vida, la soberanía reproductiva y los seres humanos. Hemos tar siempre contra un capitalismu financieru que tien un únicu oxetivu, xenerar capital, y un únicu principiu, que ye'l de la propiedá privada como única llibertá, personificada nel patrimoniu de les grandes rentes bien posicionaes dende va sieglos, y que

pasen de xeneración en xeneración, mentanto otres tamos condergaes a la precariedá histórica. Esto quier decir que la riqueza económica en toles sos formes tien que tar al serviciu del bien común, la llibertá, la solidaridá y la vida plena en dignidá ensin dexar a naide atrás.

Esiste nel estáu español una copia barata de la propaganda neolliberal que medra nesti tiempu de crisis continua, caracterizada siempres pol desempleu, la falta de recursos pa los trabayadores y l'acumulación de riqueza pal capital (el business as usual del capitalismu financieru). Esa propaganda neolliberal de la derecha extrema o nacionalcatólica, d'inspiración norteamericana, aliméntase de la sensación d'indefensión de munches trabayadores y remana, d'una mano, los símbolos del Reinu -col aquél de facer escaecer la desesperación- y, de la otra, el desenfotu de la clas obrera, que ye la única qu'acaba por pagar toles "crisis" que crea esi mesmu ultralliberalismu que se diz defensor de los trabayadores, cola paradóxica fórmula de baxar impuestos a los ricos y quitar servicios públicos a los demás. Esta receta, argumentu estrella -y de mui baxu perfil analíticu- de los think-tanks patronales espárdese ente la sociedad faciendo caltriar discursos fondamente antipopulares, que nacen de les coraes, que culpabilicen de too a les migrantes, a les persones n'esclusión social, a les que demanden derechos sociales en toles sos estayes... Nesi "a por ellos" texíu poles élites económicas que nun quieren perder la so posición, los símbolos ximielgaos y los colectivos atacaos siempres son los mesmos y máarquennos les aliances alternativas qu'hemos de propiciar na sociedad pa oponenos a esti discursu.

Nel estáu español, amás, esiste una institución, la monarquía, que se quier símbolu tamién. Como se comprobó col rei honorariu, la corona ye un instrumentu de la corrupción del neolliberalismu como namás lo pue ser cualesquier representación que tea pencima la llei como tán los reis nesti estáu español. **Aína** afita qu'un estáu que tien a persones, o a una sola persona, inmunes dafechu a la llei, nun se pue llamar democráticu y esa persona o persones van constituyise en símbolos de desigualdá y clasismu amás de polos d'atracción pa la corrupción y los corruptos. Ye por ello qu'**Aína** quier aproclamar el so republicanismu al camentar que la monarquía, como institución, ye inherentemente antidemocrática y corrupta. Non solo afitamos aquel "Asturies nun tien rei"; ye qu'afirmamos que nin lu necesita, nin lu demanda, nin quier facer pasar por títulu esa plasmación específica de la monarquía n'Asturies que se sustenta na idea d'un Principáu como gallardón y que ye, na so esencia histórica, una condena pola combatividá de la xente que vivió nesti país enantes que nós. Nesi sen, podemos concluyir afitando que ser d'izquierda, n'Asturies, ye un contratu pa cola dignidá vital d'esti pueblu y, amás, ye caltener la identidá d'un país que tien na so historia grabao a fueu la llucha pola xusticia social en toles sos formes.

03 Feminismu y xusticia

Puxamos por un pueblu dafechu llibre, pa lo que ye preciso valtar les estructures patriarcales construyies a lo llargo la historia, asumiendo'l lideralgu femenín a la hora de detectar problemes y proponer les soluciones afayadices pa superar el machismu y construyir la igualdá.

El sistema capitalista neolliberal necesita monetizar cada estaya de la vida, desnaturalizándola, amenazando directamente la soberanía reproductiva de les sociedaes: les actividaes productives que necesita, y tal como les necesita, la sociedá; el contestu que-yos pruye a les comunidaes pa la tresmisión de la vida; los cuidaos que necesiten la reciella, les persones mayores, la xente enfermu y los más vulnerables. Nun hai espeyu más evidente que'l de los servicios púbicos rellacionaos cola garantía del bientar y la igualdá d'oportunidaes (la sanidá, la dependencia, l'enseñu...), que se tán privatizando y precarizando pa dar de ganar a los inversores a costa de la calidá y humanidá del serviciu.

Nesi contestu y nestos tiempos de crisis permanente, de desempleu estructural de doble díxitu que permite a los empresarios xugar cola desesperación y necesidá de los trabayadores pa imponer unes condiciones a caldía peores, les muyeres incorpórense al mercáu llaboral pero siempre nos empleos más precarios y sacrificaos, y los peor pagaos: hostelería, llimpieza, atención domiciliaria a persones de la tercera edá. Ye verdá que se puen ver muyeres en puestos directivos tanto nel sector públicu como priváu. Pero son una minoría y los cargos qu'ocupen son siempre intermedios. Si consideramos que del sistema educativu salen más muyeres qu'homes y que salen con una preparación meyor, ye evidente que la muyer estréllase contra muries mui reales pero invisibilizaes.

Al tiempu que se precariza'l llabor profesional de les muyeres, llendándoles a los trabayos peor consideraos y pagaos, magar que muchos son pegoyos esenciales que tienen por tol texú social, en casa son elles les que tienen qu'atender mayoritariamente les necesidaes reproductives, necesidaes que yá nun cubre un sector públicu en desaniciu pol petite xabaz del neolliberalismu por siguir sacando dineru de cualesquier actividá humana darréu de la so necesidá d'una medría siempre constante pa nun esbarrumbar. Esi neolliberalismu tien como más altos voceros n'Asturies al partíu ultraderechista nacionalcatólicu y a los demás partíos de derecha a los que-yos tien secuestráu'l discursu.

Esto ye, n'Asturies y el mundu del sieglu XXI pídese a les muyeres unos sacrificios personales que nun se pide a los homes, asumiendo mayoritariamente la sociedá qu'esos sacrificios son intrínsecos a la condición femenina pero non a la masculina. Y esi llabor, ensin reconocimientu nin compensación de nengún tipu, ye una de les grandes barreres que torguen que les muyeres seyan llibres de persiguir la so

03 Feminismu y xusticia

propia realización personal, privando a la sociedad d'una manera estremada de ver la so propia estructura y buscar un futuru más xustu y igualitariu.

El patriarcáu tórnase, nesti contestu, nel sociu perfectu, perpetuando los principios y los vezos qu'arrequecen a más de la metá de la población nunos espacios con menos llibertá, menos oportunidaes y menos visibilidá. Asina, millones de persones nel mundu ven los sos derechos amenorgaos pola violencia - psicolóxica, física, económica y sexual - dende'l so nacimientu y ensin más motivu que'l so sexu, violencia que reprime especialmente a les que nun encaxen na manera de comportase y rellacionase que manda la tradición patriarcal.

N'Aína, por embargu, queremos mirar al futuru con esperanza y arguyu: la esperanza de seguir ganando batalles a la desigualdá y l'arguyu de dar el relevu a toles que llucharon enantes que nosotres. El feminismu vino pa quedar, cola fuercia imparabile de les que tienen razón como arma escontra'l machismu dominante y los que se resisten a la perda de los sos privilexos. Les muyeres hemos reclamar el nuestro espaci u na vida política, na xeneración d'opinión y na toma de decisiones, asina como en toles estayes culturales, sociales, económicas... Solo les polítiques que desixan esta presencia en tolos ámbitos de la vida van ser capaces de construyir un mundu más xustu.

04 Futuru n'Asturies

Asturies ye, tradicionalmente, un país industrial y pa seguir siéndolo ye preciso tresformar el sector, de manera que seya sostenible, viable, saludable y caltenga l'empléu. Nun podemos arrenunciar a una capacidá productiva xusta pa cola nuesa economía y mediu ambiente.

Énte'l camudamientu climáticu, Asturies nun pue seguir lluchando les batalles de sieglos pasaos alreduro de la mina y otros grandes industries con índices mui altos de contaminación ensin facer nengún tipu de cambéu d'enfoque. Eso nun significa, sicasí, que les asturianos tengamos que renunciar al empléu plenu y a una vida de calidá pa nosotres y la nuestra descendencia. De fechu, la delda histórica que tol estáu tien pa con esti pueblu que punxo a andar a trés turnos la máquina industrial, enxamás foi paga y ha ser reclamada: llantáronnos fábricas, trabayemos nelles, subvencionáronse pa que nun marcharen y, a la fin, muévense a otru sitiu onde les vides valgan menos pa seguir faciendo lo mesmo.

En primer llugar, ye imprescindible avanzar nel camín d'una soberanía enerxética que lleve lluz y calor a les nuestres

cases al tiempu que s'aseguren los servicios que necesita la ciudadanía y la industria. Cuidamos qu'Asturies dispón de los recursos naturales pa conseguir averase haza la soberanía enerxética al traviés d'una combinación d'enerxíes caltenibles. Cuidamos, tamién, que les nuestres instituciones tienen que poner fin al secuestro del mercáu enerxéticu, que, privatizáu, impónnos unes tarifas abusives que precaricen la vida del pueblu y ponen en peligru l'actividá económica y llaboral n'Asturies. Equí producimos enerxía, carecimos les consecuencias y, llueu, pagámoslo como si fuere importao mentanto les empreses electrointensives xueguen col nuestro pan y úsenos como rehenes d'una negociación col estáu pa llograr meyores tarifas. ¿Habría que recorda-yos que l'estáu pue tomar el control sobre tola riqueza d'un país pa ponela al serviciu del bien común?

Igual que defendemos la nuestra soberanía enerxética, hemos puxar por una soberanía alimentaria que nun tien que tar llendada namás a la carne, la lleche y la güerta. El sector primariu ufierta munches más oportunidaes y la nuestra historia demuéstranos que podemos recuperar industries agrícolas, como la de la castaña o l'ablana, y potenciar otres nueves, como la del kiwi. Ye necesario, amás, recuperar cuotes d'actividá nuna industria de la que fuimos líderes internacionales, la pesca, y cuidar industries qu'entá resisten, como los astilleros o la madera.

Ye especialmente sangrina la situación de los autónomos nel nuestro país: cóbrase-yos por trabayar; proporcionalmente dediquen más recursos propios que naide pa pagar impuestos, y la so situación énte'l desempleu, los accidentes, les malures y la xubilación son les peores posibles. Dende **Aína** camentamos que tienen que camudar toes estes condiciones que s'imponen a les trabayadores por cuenta propia pa escomenzar a criar riqueza y trabayu de calidá y p'acabar con una situación d'autoprecarización, semi-esclavitú atapada y desamparu en munchos casos que s'escuende tres d'ello. A toos estos autónomos y pequeñes empreses qu'escoyeron voluntariamente autoorganizar y autoxestionar el so trabayu, ye necesario iguala-yos los derechos colos de los trabayadores por cuenta ayena, sofitar el so desarrollu n'Asturies y potenciar asina una economía social comprometía col territoriu y colos derechos llaborales de toles persones implicaes nel procesu productivu.

Mención aparte ye la del fenómenu de les falses autónomes: persones que trabayen el 100% del so tiempu pal mesmu pagador, qu'usen la so infraestructura, que lleven les sos máquines y trabayen colos sos materiales pero que nun cuenten como trabayadores reconocíes porque, asina, la empresa aforra de dales d'alta na seguridá social. Sobren los casos asina, constituyendo una precarización del emplegu mui esparcida nun sector terciariu qu'emplega les fórmules de venta y distribución xabaces como nos casos de riders y repartidores a domiciliu. A la fin, ye too culpa d'un mercáu

llaboral basáu na subcontratación y na externalización qu'afala l'apaición d'estos fenómenos.

Ye mui importante, sicasí, damos cuenta que les revoluciones industriales clásiques, les de la producción industrial en grandes fábricas, nun representen la única fonte d'empléu asalariáu. La nueva revolución industrial ye la cultural, la de la información y la comunicación, un campu ensin tocar n'Asturies cuando tenemos unos recursos culturales y históricos abondosos que puen xenerar productos d'altu valor añadíu y empregos de calidá.

Esi despreciu a lo propio refléxase en números macroeconómicos cuando vemos que la industria cultural asturiana nun llega a los mil profesionales mentanto en Galicia, por casu, proporciona un sustentu de vida a 27 mil persones; cuando podemos ver producciones cinematográfiques n'euskera, catalán o gallegu nes grandes plataformes mientres la TPA ye xermen de casi nada y contentámonos con que productores de fuera vengán a rodar los paisaxes asturianos; cuando nun se sabe o nun se quier promocionar una música asturiana de gran calidá, inclusive desaprovechando grandes espacios internacionales de conexón atlántica; cuando nun s'acierta a crear un circuitu permanente de música y teatru; cuando la lliteratura asturiana nun ta nin na mayoría los escaparates de les llibreríes asturianas; o cuando los diputaos y diputaes de la Xunta Xeneral nun son a cumplir la so Constitución española faciendo cooficiales les dos llingües propies d'Asturies, torgando asina la llegada de fondos de Madrid y Bruseles pa contribuir a acabar con esta situación llaceriosa de la industria cultural asturiana.

¿Y el papel de la Universidá d'Uviéu no tocante a la investigación, el desendolcu de nueves ideas que pongan los finxos pa una producción industrial -a cualesquier escala- eficiente, moderna y axustada a los nuevos retos sociales y económicos? ¿Por qué seguimos precarizando al personal más capacitao y formao, que tenía que tar ufriendo les alternatives en forma de nuevos productos y práctiques pensaes, diseñaes, fabricaes y comercializaes equí y agora?

Poru, queremos aguiyar a la modernización de les alministraciones públiques asturianas dende parámetros d'utilidá, axilidá y eficiencia al empar que proponemos la creación d'una Axencia Asturiana de Planificación y Captación de Recursos qu'investigue y depués asesore al gobiernu asturianu, la Xunta Xeneral, les PYMES, los autónomos y toa persona que viva y/o quiera desenvolver un proyectu de vida digna y en llibertá y xusticia n'Asturies.

05 Territoriu

Ye necesariu un nuevu modelu pal seutor primariu, como única salida viable pa los conceyos del nuesu país. Defender la productividá del rural asturianu —la ganadería estensiva, l'agricultura y la pesca de baxura— ye contribuyir a un futuru más xustu nel nuesu territoriu.

Asturies ye, tradicionalmente, un país onde la población vive disperso, ocupando'l territoriu. La esistencia de conceyos -grandes en comparación colos del estáu español- ye la forma d'organización tradicional xunto a les parroquies, entidaes más cercanes y pequeñes. Nesti contestu, les economíes yeren mestres, en munchos casos, con calter complementariu ente lo industrial y lo agro-ganaderu. Pero esti modelu yá nun ye'l principal: la tercerización de la economía asturiana ye mui fonda, desindustrializándose les zones más productives del sector secundariu y primariu y aneciando nel monocultivu del sector servicios y la hostelería, que dexa de llau la producción agraria, ganadera, pesquera, minera, enerxética, metalúrxica y/o siderúrxica. Nesta tresformación, Asturias féxose más dependiente d'otros territorios productivos nun procesu que dexa inxusticia al so pasu porque alloña a productores de consumidores, beneficia les centrales intermediaries y ye cultivu de fondos buitre y especulación.

La lliberación y globalización de los mercaos de alimentos promovíos poles polítiques públiques dictaes pola Política Agraria Común europea frayaron un sistema productivu llocal basáu na cultura y saber campesín que yera capaz de alimentar al país de forma caltenible, produciendo alimentos sanos y de calidá. La especialización y subsectorización del sector fexo a ganaderos y llabraores esclavos d'insumos esternos y créditos, y dexó la seguridá alimentaria d'Asturies en manes del mercáu global. Estes polítiques dexen al sector nuna fonda crisis que supón perda de puestos de trabayu, zarru d'esplotaciones, falta de relevu xeneracional... A too esto hai que sumar la presión turística y xentrificación que xeneren una burbuja especulativa alrededor de la vivienda y la tierra, que dificulta hasta facer casi imposible la incorporación de xente mozo nuevo al sector.

Nesti contestu, **Aína** camienta que la ganadería, l'agricultura y la pesca son actividaes estratéxiques básiques p'Asturies y les asturianos como pegoyu p'avanzar haza la soberanía alimentaria y la xusticia pola que naguamos pa nós y pa tollos pueblos de la Tierra.

Poru, ye necesaria una planificación con visión de país de la producción, la tresformación, la comercialización, la formación y la sensibilización, desendolcando sistemes alimentarios llocales qu'aseguren una alimentación sana, xusta y de calidá, al tiempu que fixa población na fastera rural, garantizando l'equilibriu nel accesu a servicios ente lo rural y lo urbano, cohesionando'l territoriu. Ye necesaria una agricultura y una ganadería

05 Territoriu

vertebraora del territoriu y del paisaxe, arguyosa del so saber y cultura campesina, rica y diversificada, que faiga frente al monocultivu d'ocalitos y turistes, pa dexar de ser una postal del paraísu natural y pasar a ser parte activa na tresformacion d'Asturies nun exemplu de sistema agroalimentariu caltenible.

Hai que-y poner fin al monocultivu y les imposiciones de les multinacionales de l'alimentación que, col envís d'acutar pa sigo la producción alimentaria mundial con fertilizantes tresxénicos y semiente estéril, acaben coles productores llocales, indirecta y directamente, cola productividá de les sos tierres y la so actividá. Les polítiques públiques pa con estes actividaes tienen que dar un xiru de 180°, pasando de la cultura de la cuota y el mercáu (anti) reguláu, que pieslla esplotaciones, a un paradigma nuevu de la vida y el futuru dignu pa garantizar dalgo tan básico como la sobrevivencia física de los seres humanos.

N'**Aína** proponemos que se lleventen les estorbises burocrátiques pa la producción, que s'axilien al másimu les compensaciones por pérdidas (desastres de la naturaleza, depredadores) y que s'ayude a les pequeñes producciones llocales a comercializar los sos productos cola creación d'una rede de distribución qu'acabe col númberu escesivu d'intermediarios ente los puntos de producción y los de venta, afalando asina que se consuman productos de cercanía, que se cree riqueza y que mengüe la güelga ecolóxica como consecuencia de los cultivos intensivos y los monocultivos que llenden la capacidá d'autoalimentase de los pueblos de la Tierra y que los convierte n'esclavos de les multinacionales y los especuladores.

06 Servicios públicos

Los servicios públicos son la única garantía pa que les nueses vides valgan igual que les de los ricos. Pero, ye necesario cuidar y ameyorar la sanidá y la educación y, al tiempu, ampliar la cobertura pública a otros estayes como la vivienda, enerxía, cuidaos, trabayu y ciencia.

Munches vegaes, una mirada crítica haza lo que nos tresmiten les grandes empreses de comunicación privaes ufre muncha información: ¿por qué nelles nos falen de “gastos sociales”, “gastos sanitarios”, “gastos educativos” y, por embargu, falen de “incentivos a la producción automovilística”? El sector públicu ye una de les últimes fronteres pal capitalismo nel nuestro país. Pensaos pa garantizar derechos -y non pa xenerar

dividendos pa los consejeros d'administración- los servicios sociales tán siendo atacaos xabazmente nes últimes décadas. Quiérenlos; nagüen por ellos les grandes corporaciones que pretenden sustituyir un modelu de cobertures sociales mínimes por seguros privaos. Cola sida de “la competencia”, que supuestamente diba baxar el preciu del serviciu, privatizaron les comunicaciones, la enerxía, los recursos del suelu, el tresporte, la banca pública...¿Y qué nos dexaron? Una suerte de conglomeraos qu'ufren un serviciu deficiente, que nos sangren con precios ensin control y qu'acueyen como consejeros a los mesmos políticos que llexislaron al so favor.

N'**Aína** sabemos que nun se pue consiguir xusticia social ensin servicios públicos fuertes y de calidá. Asturias necesita munches más profesionales de la medicina, los cuidaos y la educación, y precísalo ensin interinidaes, con estabilidá y en condiciones dignes pa cuidar a la nuestra xente.

Asturias necesita más trenes, más infraestructures de tresporte públicu per tol territoriu (sobre too, les faces que tán más lloñe del centru'l país, les más precaries) y a precios populares de manera que l'accesu a los puestos de trabayu, a los centros escolares y de cultura, y a los centros de salú, seya rápidu, baratu y ecolóxicu.

Asturias necesita un parque de viviendes públiques que permita la emancipación de la mocedá y dar rempuesta a la urxencia habitacional de la población. Necesita un accesu a una vivienda digna y de baxu costu pa los más vulnerables, pa que tengan la posibilidá d'integrarse a una vida plena y productiva pa ellos y pa tola sociedá. Y, precísalo, alloñando d'esti sector a les empreses asusta-mayores, que quieren comerciar col mieu a unos allanamientos de morada que, llueu, naide conoz.

Asturias necesita una empresa pública de la enerxía que fixe una tarifa eléctrica asturiana; que garantice l'accesu a bienes de primer necesidá como son la lluz y el calor, nun contestu nel que nos tán llevando, otra vuelta, a pasar fríu, al deterioru físicu de les nuestres vides por mor de nun poder pagar les factures que, nun mercáu fondamente respaldáu dende lo públicu con subvenciones, saca cuentes añales de récord en ganancies nel IBEX.

Asturias necesita unes infraestructures del internet que lleguen al requexu últimu del país y permitan a los asturianos y asturianas escoyer llibremente'l llugar onde quieran llevar alantre'l so proyectu de vida. Y precísalo dende lo públicu, porque les grandes empreses de telecomunicaciones, que s'arriquecieron como nunca nel andanciu, namás entienden de socialización de perdes y privatización de ganancies con un serviciu qu'anguaño ye imprescindible pa la vida llaboral y educativa, pal desendolcu personal.

Agua, llimpieza y xestión de residuos, sanidá, vivienda, enseñu, cuidaos y atención a les mayores, enerxía, telecomunicaciones...

06 Servicios públicos

¿Qué más falta pa que se decaten de que nun esiste horizonte visible si dende lo públicu nun s'emburria tolo posible pa que los mínimos derechos humanos se cumplan n'Asturies? ¿Qué más necesiten ver que nun funciona pa revertir la perda de soberanía sobre la economía qu'entamó col declive industrial d'Asturies y que nos lleva a depender de les xugaes estratéxiques y la especulación qu'exercen los consejos d'alministración de les grandes corporaciones?

07 Cultura y globalización

Recuperar l'autoestima colectiva pasa per torgar que se faiga de menos la cultura popular de los homes y muyeres d'esta tierra. Vindicamos una Asturies arguyosa de les sos llingües y del so patrimoniu cultural, que fale d'igual a igual con toles cultures del planeta.

La soberanía cultural y educativa ye clave pa poder definir qué sitiü queremos ocupar les asturianos en mundu. La cultura asturiana, en toles sos estayes artístiques y populares, y les sos espresiones más altes, l'asturianu y el gallego-asturianu, son delles de les aportaciones más importantes d'Asturies a la humanidá y el so desenrollu durante cientos d'años ye l'adaptación más fiel del inxeniu humanu a les circunstancies físiques específiques que tuvo que superar el pueblu asturianu. La so plena recuperación pasa pela soberanía cultural, que significa poner tola maquinaria de que disponen les instituciones asturianas pa caltener un patrimoniu material ya inmaterial únicu ya irrepetible. Facer oficial la realidá sociolingüística asturiana ye emplegar la ferramienta llegal qu'anguaño tenemos al algame pa tener una oportunidá, namás una, de salvar una cultura na dómina de la globalización económica y aculturización sociopolítica que carecen los pueblos de tol mundu.

Poner a funcionar la nuestra soberanía cultural tien que querer dicir que los asturianos y asturianas nun somos un conxuntu d'individualidaes espardíes pel territoriu a lo xole, sinón una comunidá afitada históricamente, una nación, que sabe p'hacia aú quier tirar como grupu humanu nel contestu cercanu y llonxanu: ye una llucha escontra l'escaezu, pola dignidá de la nuestra xente, una xera que busca rescatar de la desapaición les espresiones humanes que nos truxeron hasta güei, que xestionaron el territoriu, que fixeron habitable esta tierra pa les xeneraciones futures. Ye semar la grana pa qu'esti pueblu nun escaeza d'au vien nin lo que ye, nun contestu de perda de población y tresformación del nuestro tipu de rellación col entornu onde vivimos.

07 Cultura y globalización

Cultura pa educar a la población na querencia poles espresiones más solidaries de la nuestra historia, pa defender l'intercambiu n'igualdá como alternativa a la imposición vertical a la que nos emburria'l modelu social, económicu y políticu nel que vivimos y que dicta cómo hemos falar, pensar y consumir. Cultura y educación, siempre, como prioridá pa facer escuela: pa ser, pa seguir siendo, pa dir a meyor.

08 Derechos humanos

L'asturianu ye un pueblu qu'acueye, ensin dexar a nadie atrás. Nenguna persona pue ser discriminada pol so orixe, sexu, raza, relixón, orientación sexual o adscripción de xéneru. Lluchamos por iguar estes discriminaciones dende'l so raigañu y desaniciales pa siempre.

La bayura de llingües, cultures, relixones y oríxenes que conviven anguaño n'Asturies son una riqueza pal nuestro país qu'hai que protexer y afalar. Tenemos que sacales del arrequexamientu políticu que carecen, poneles enriba la mesa pa que normalicemos la so presencia, la so existencia, desterrando los discursos del odiu a lo que nun se conoz o entiende. Nun ye dalgo, por desgracia, que tea pasando. Tampoco nel tarrén de les estremaes identidaes sexuales, afectives y de xéneru. Toes elles son, anguaño, blancu de los mensaxes d'odiu que lleguen dende los sectores más ultres de la sociedad.

Pa les migrantes –que vienen a Asturies, sobremanera, del norte d'África, América Llatina y Europa del este– pónense toles torgues del mundu p'algamar los mesmos derechos que'l restu de trabayadores que vivimos nel país. Ye urxente una llei que regularice la situación de miles de persones que viven y trabayen n'Asturies y que nun xueguen colos mesmos derechos que'l restu de la población. Nin siquiera se consigue una convalidación d'estudios, zarrando asina'l pasu al mercáu llaboral cualificáu a munches profesionales, tornando una bayura de perspectives que sedríen una ayalga pa la sociedad. Esta situación ye entá más sangrina nes muyeres, como siempre, les doblemente oprimies en tolos contestos llaborales y sociales.

Aína quier afitar equ'l so compromisu cola Declaración Universal de los Derechos Humanos como foi aprobada na ONU en 1948 y que diz, nel so artículu dos, que “toa persona goza de tolos derechos y llibertaes afitades nesta Declaración, ensin estremamientu nengún de raza, de color, de sexu, de llingua, de relixón, d'opinión política o de cualesquier otra mena, d'orixe

nacional o social, de posición económica, de nacencia o de cualesquier otra condición”.

Nun contestu social aú los discursos más agresivos escontra la diversidá tán ganando tarrén ye preciso tornar a recuperar l'enfotu de la Declaración de los Derechos Humanos -redactaos precisamente tres la barbarie del nazismu y fascismu nel sieglu XX- en toles sos formes, garantizando la convivencia social y la xusticia nes sos acepciones más completes.

Asinamesmo, hai qu'emburriar la redacción de nuevos contestos llexislativos que permitan dotar de seguridá y derechos al collectivu LGTB+, que carez la violencia estructural (y física) d'un sistema que nun ye quién, entá, a integrar la diversidá de realidaes sexuales, afectives y de xéneru de la nuestra sociedá. ¿Qué Asturies nueva tariemos construyendo ensin que toes y toos respiremos igualdá?

09 Internacionalismu

Los estremaos pueblos de la Tierra han rellacionase dende los principios de la cooperación, la non agresión, la non inxerencia y la igualdá, a la gueta del bien común, la paz y la xusticia na más amplia de les sos acepciones.

A los pueblos y trabayadores del mundu únenos muncho más de lo que nos separa, por más que les visiones más viscerales y supremacistes no políticu y económicu nos quieran facer ver lo contrario. Tenemos un gran interés común: el bientar de les clases populares y la capacidá de facelo ensin perxudicarnos unos pueblos a los otros, al traviés de la cooperación, la convivencia en paz y la defensa de la igualdá y xusticia en sentíu ampliu. Desgraciadamente, el mundu nun funciona asina: los países poderosos arramplen cola riqueza d'otros pueblos que queden a miles de kilómetros mentanto dexen miseria y rexímenes afines de fondu raigañu autocráticu. Les situaciones replíquense en contestos más piquiñinos, afondando na resquebra y sufrimientu social mentanto que nós, el común, ponemos les nuestres vides al serviciu d'intereses ajenos.

09 Internacionalismu

Esto nun pue ser asina, de nenguna manera. Por exemplu, la pertenencia del estáu español a estructures económico-militares como la OTAN llévanos a tar del llau del bloque que ye responsable del mayor de los belicismos que conocimos nel últimu sieglu. La riqueza que xeneramos les y los trabayadores ta siendo destinada a caltener les cadarmes militares que, lloñe de mirar pola paz y les desescalades armamentístiques, valen pa que xente como nós muerra matando a otra xente como nós. La industria militar, col espoliu de recursos de fondu, ye un gran negociu pal que nós ponemos les vides y los recursos, mentanto la democracia y los derechos tamién son bombardeades col mesmu proceder.

Ye urxente'l diseñar lóxicos nueves pa que los pueblos nos rellacionemos dende otres coordenaes desterrando les guerres, los conflictos y les miseries que promueven les élites de delles de les naciones más puxantes del mundu: les imperialistes y les que les sofiten.

10 Democracia participativa

El Pueblu Asturianu ye quien más manda: recuperar el conceyu abiertu y formentar polítiques de participación popular ye una prioridá urxente énte la desmovilización, l'apatía y l'individualismu al que mos conderga esti sistema. Pongamos nel centru l'alderique p'algamar el bien común.

Una verdadera democracia participativa, una soberanía popular -daveres- rispe porque toles decisiones y polítiques qu'afecten al ciudadanu tienen que debatise y adoptase cerca del ciudadanu. Enantes afitábemos que'l gobiernu d'Asturies tenía que tener les competencies p'abordar los problemes d'Asturies, asina como la capacidá de recaldar los sos propios fondos al traviés d'impuestos y asina ser pa llantar prioridaes y polítiques independientes axustades a les necesidaes del pueblu asturianu. Pero ye que'l sentíu últimu de la democracia participativa ye la soberanía popular, construyida por individuos llibres y, polo tanto, el másimu de competencies y capacidaes tien qu'averase a los conceyos, les parroquies, les collaciones, los pueblos y los barrios, incorporando'l derechu tradicional siempre dientru del respetu a la igualdá en dignidá y llibertá de toles persones, y afalando que seyan los

10 Democracia participativa

vecinos los que se pronuncien y decidan la solución a los sos problemas más inmediatos.

Asina, hai que desterrar la despolitización y l'alloñamientu ente sociedad y representantes políticos, fenómenu que ye l'antesala de la desmovilización, el populismu y la perda de derechos que fueren ganaos con munchu esfuerzu.

No tocante a la participación efectiva nel día a día de les decisiones que llenden la economía y la sociedad, hemos facer nuestros dos principios clásicos: “nada que nun seya lluchao, nada que nun arrampuñemos, vendrá a ser de la nuestra casa” y “toa política que nun tea fecha por nós, va ser fecha escontra nós”. Educar, güei, na participación ye vacunar escontra la imposición, la perda de servicios y la corrupción política.

Pallabres finales

Asturies y el delgáu filu históricu del asturianismu políticu deben muncho al activismu cultural qu'arrancó'l so andar nos años últimos de la dictadura con Conceyu Bable. Pero **Aína** nun ye namás el representante políticu d'un movimientu cultural como fora aquel nel so entamu. **Aína** tampoco ye una imitación nin una sucursal de dengún movimientu o partíu políticu d'otros países del estáu español, Europa o'l mundu.

Ye evidente que muchos de nosotros y nosotres venimos del activismu políticu, sindical, cultural y asociativu. Ye evidente que miramos al mundu y vemos les soluciones qu'otros partíos apliquen o tenten d'aplicar a los sos propios contestos. Pero tenemos que sorrayar qu'Asturies tien la so propia idiosincrasia, los sos contestos y necesidaes úniques y que cualesquier idea, solución o sistema que se quiera explorar tien que tener en cuenta esa idiosincrasia, contestos y necesidaes.

La verdadera esencia d'**Aína** ye la d'un partíu que dende la oposición o'l gobiernu d'esti país tien la vocación d'avanzar hacia un futuru de bientar y llibertá pa toos y toes les que viven nesti país, onde s'exerciten toles soberaníes

mencionaes nesti testu, dende los nuestros 10 principios fundacionales, hasta conformar una sociedá de vida y futuru onde nun sobre nada nin nadie.

Nesti enfotu, **Aína** quier espurrir la mano a la xente más comprometío col oxetivu d'algamar una vida de xusticia y llibertá pa toes. Pero queremos ser tamién una lluz d'esperanza y enfotu pa esi 40% d'asturianos y asturianas que nun se ven representaos por partíu políticu dalu y, sistemáticamente, nun voten. A ellos, especialmente, queremos dicir qu'Hai Camín.

Aína entama güei un camín que tien por enfotu'l crear un puntu de vista nuevu n'Asturies, asturianizar les miraes y ufrir maneres nueves de ver lo que nos pasa. Como nel cantar, "ye la hora de la llucha y el llabor"; ye la hora de crear un programa pa una Asturies que pague la pena ser vivida. Güei entama esti nuevu emburrión que queremos dar con toes vosotres y vosotros.

Güei, damos-y otra oportunidá a les pallabres optimismu, enfotu, remangu y futuru p'apellar a lo que naguamos que seya esti país, entá verde, que mira dende la mar al monte y dende'l monte a la mar. Queriendo ser como yá foi; queriendo seguir siendo, milenta años más.

